

共同經課-1 約拿書三章一節～五節、十節

1 耶和華 ê 話第二 pái 臨到約拿講，你起來，去尼尼微 hit-ê 大城；2 我所命令你傳 ê，你傳 hō伊。3 約拿就照耶和華 ê 話起來，去尼尼微；尼尼微是極大 ê 城，tiòh 行三日 chiah 會 thàng。4 約拿入城起身行一日 ê 路，傳講，Koh 四十日，尼尼微 beh 倒壞。5 尼尼微人信上帝，就宣佈禁食，tùi 大到細，lóng 穿麻衫。10 Tùi án-ni，上帝看 in ê 行做，有離開 in ê pháí<sup>n</sup> 路；上帝就退悔祂所講 beh 降 hō in ê 災厄，亦無降落。

共同經課-2 詩篇六十二篇五節～十二節

5 我 ê 神 ah，你 tiòh 靜靜，專務 thèng 候上帝；因為我 ê òng 望是 tùi 伊來。6 獨獨伊是我 ê 石磐，是拯救我 ê；伊是我 ê 高台，我 boē 搖動。7 我 ê 拯救，我 ê 榮光，在 tī 上帝；我 ê 氣力 ê 石磐，我 ê 閃避 ê 所在，亦在 tī 上帝。8 Lín 眾百姓，tiòh 時時 oá 靠伊；Tī 伊 ê 面前 pià<sup>n</sup> 出 lín ê 心；上帝是咱逃閃 ê 所在。[Sè-láh]9 卑微 ê 人真正是空虛，尊貴 ê 人也是虛假；Hē tī 天秤碗，的確浮起來，In 一概比呼吸 ê 氣 khah 輕。10 M̄-thang oá 靠暴虐；M̄-thang 因為搶 thèh 來驕傲；若財寶加添，m̄-thang 注意 tī-hia。11 上帝講一 pái，我有聽見兩項；就是權能屬 tī 上帝。12 主 ah，慈愛亦是屬 tī 你；因為你照 tak 人 ê 所行來報應伊。

共同經課-3 哥林多前書七章二十九節～三十一節

29 兄弟 ah，我 koh 講，時日促短 lah，所以 tùi ta<sup>n</sup> 以後，有 bó ê tiòh 親像無 bó，30 啼哭 ê 親像無啼哭，歡喜 ê 親像無歡喜，買 ê 親像無所得 tiòh，用世間 ê 物 ê 親像無 lām-sám 用，31 因為 chit 世間 ê 款 teh 過去 lah。

共同經課-4 馬可福音一章十四節～二十節

14 約翰已經關監，耶穌到加利利，傳上帝 ê 福音，講，15 日期滿 lah，上帝 ê 國近 lah；lín tiòh 反悔來信福音。16 耶穌經過加利利 ê 海墘，看見西門 kap 伊 ê 兄弟安得烈拋網 tī 海裡；因為是討魚人。17 耶穌 kā in 講，Lín 來 tè 我，我 beh hō lín 得 tiòh 人親像討魚 ê。18 In liām-pi<sup>n</sup> 離開網，來 tè 伊。19 Liòh-á 進前，看見西庇太 ê Kia<sup>n</sup> 雅各 kap 伊 ê 兄弟約翰 tī 船裡 teh 補網。20 伊 liām-pi<sup>n</sup> 招 in，in 就拜別 in 老父西庇太 kap 僱工人 tī 船裡，來 tè tī 伊 ê 後面。